

國
朝
詩
鐸

國朝詩鐸卷一

錢塘張應昌仲甫編輯

歲時

春雪歌

申涵光

北風昨夜吹林莽，雪片朝飛大如掌。
南園老梅凍不開，飢鳥啄落青苔上。
破屋寒多午未餐，擁衾對雪空長歎。
去歲雨頻禾爛死，冰消委巷生波瀾。
吳楚并乾江底拆，北方翻作蛟龍宅。
豪客椎牛畫殺人，彎弓笑入長安陌。
長安畫閣壓氍毹，獵罷高懸金僕姑。
歌聲入夜華燈煖，不信人間有餓夫。

夏雹行

錢澄之

四月初夜風雨大雷電穿窗窗紙破呼僮挂門帷藏燈
屋上茅掀不敢臥老農早起聲叫呼新秧如鍼一半無
始知夜來天雨雹大者徑尺小盈握工人細察雹傷處
邊江一帶無多路又見有龍江北來雨雹相隨渡江去
其占此灾主兵凶。六月三伏災復同黃禾垂粒雹打盡
老農拊膺黃雀慶冬雷夏雹本天變豈有一年兩度見
天官占驗不敢知壞我禾稼使我饑

苦寒行

倪承茂

燕山九月卽飛雪元冬寒氣更栗烈河西冰膠午不開

山頭凍雀眼流血荒城日暮少人行
茆檐幾處炊烟絕
雲黯風饕日色黃槎枒老樹重陰結
朱門貴客狐白裘
擁爐酌酒羅珍羞誰憐路有凍死骨
旬日委棄無人收
况聞淮南罹水患十家八九趨他縣
窮途無食給饔殮
那有兼衣禦霜霰昔年杜老憂民艱
願得廣厦千萬間
而今寒士流離轉溝瀆雖有萬間知不足

哀凍死者

陳文述

盛夏旣酷暑嚴冬必奇寒朔氣動
鬚發物情慘不歡
北風利刀箭中人若刻刻積雪沍衢路
堅冰結井幹
貓犬亦就人饑鳥息羽翰重裘襲
狐貉不異衣
襦單矧此無

衣民短褐嗟不完赤足露肩膊瘦骨支髀髀被體尙如
此豈能望豆簞夜聞泣路隅曉已乞柳棺城闔與巷陌
葦箔橫闌千里正報官府跳躍走豺獾一一待臨驗官
亦行路難昨聞大官過牽舟逆羽綻暮發胥江驛朝泊
梁涇灣山魈走躑躅跛鼈行蹒跚斃者十餘輩僵臥如
鼠跽見者慘肌骨聞者摧心肝閭門十萬戶富家殊闐
殷百十付褚師拯此惇與鰥庶生太平世不負天地寬
綈袍感范叔大裘念香山仁義各自爲不在心力閒窗
外聲颯颯天上雲漫漫呵凍作此詩讀竟還三歎

冬暖行

屠倬

窮冬短景飛陽烏照人顏面汗如酥南園早梅花亂發
游蜂薨薨蝶蠕蠕短檐窮民快鼃飽上脫絮帽下無裾
傲傲醉舞踏街市中有老人嗟歎吁閉藏不密陽氣洩
奮雷起蟄陰慘舒原田句芒已畢達一冬雨雪三日無
二氣升降有錯迤來年只恐戕春蘇不見丙辰正月雪
老樹凍煞千百株

冬雷行

施閏章

今年八月春氣催贛江桃李花亂開仲冬蛙鳴草不死
殷殷動地聞奔雷朝訇東南暮東北翻盆驟雨荒城摧
乾坤戶牖何不閉顛倒入極聲喧豕江南夏旱秋雨淫

巴州漢水洪濤深澤國魚龍窟城市人家煙火棲山岑
百年怪事真罕見儉歲嗷嗷偏穀賤催科力盡無金錢
上下相看淚如霰

上元行

申涵盼

上元之夕人如狂新燈新月同光芒沈沈玉漏風色涼
綵樓烟接虹橋長誰家游女踏春陽珠環翠髻明月璫
誰家馳馬少年郎雕鞍繡服紫金裝朝臣朝罷歸倉皇
張燈高會清燕堂蛾眉擁簇奏宮商盤堆珍錯杯瓊漿
年來日日慶豐穰安樂不知戒履霜君不見長安門外
海波揚介冑之士裹新瘡又不見長安門內多流亡夜

靜呼號聲慘傷何不移黿綵以補戰士裳。作膏粥以充
饑者腸。胡爲乎銀花火樹道相望。上元之夕人如狂。

觀燈行

李繩

觀燈例放上元夜。今歲二月盛張燈。吳俗侈靡劇好事。
況傳燈綵尤薨薨。一朝風偃令何速。錦幄戶戶流蘇棚。
閭胥濠上最瑰麗。人物幻翦綾羅繒。一家巧勝萬家鬪。
綺結樓閣懸層層。宵來蛺蝶膏徹衢。陌百花簇燦琉璃屏。
衽袂鉤連競摩擦。肩背合沓疑頽崩。就中豔誇仙人燭。
珊瑚搖曳朱絲繩。紫煙滿路千萬影。不知皓魄當空升。
興然行辟來前導。倅與丞云領棉鐵甲解赴西川征黃

旗隊隊眼晃耀似與燈彩爭光。晶川賊跳梁川沸騰。列
柵屯戍飛流星。雪山無路樵寒冰。鳥道一綫踰凌兢。可
憐此邦勞轉餉。三軍待續傳鼉更。吾鄉賞燈一何樂。歡
呼長夜豪興增。均屬赤子煦滅澤。向隅泣望銷戟矜。元
宵重慶古則有。無益傷財聖所懲。吁嗟乎歲時嬉遊多
失職。張燈一夕費千億。何如散與窮黎作衣食。否則輸
佐儲胥仰報國。

競渡歌

朱昆田

白龍潭圓如鏡。年年五月龍舟競。市上紛紛走少年。未
到五月先斂錢。今年龍舟更加樣。擔酒椎牛集丁壯。競

兒醉飽驕豢龍一一乘潮能超漲五月五日天氣晴空
城倒巷奔吳僉人頭戢戢如束筍人聲隱隱如飛蚊或
聚如鬪蟻或散如驚麕朱樓臨水簾半開紅窗小舫連
翩來盤雲髻滑金釵溜窄袖衫輕白苧裁琥珀光傾大
小甃定州瓷盤出冰鱖命縷新纏五色絲香蘆小裹九
子糗醉眼爭看日端午春雷填填聞打鼓龍頭捲晴波
龍尾攬素浪吳綾翦作旗蜀錦裁爲障競兒把槳各竦
聽疾徐恰與鼓聲應鼓聲徐輕樺緩棹閒以舒鼓聲疾
長招幹波無一失忽然趨勢眠水中似欲入水尋龍宮
四圍觀者盡失色蹶然而起何其雄亦有好事者買鴨

投龍潭鴨頭乍沒水羣龍爭來搏標竿一丈船心蘊
上竿頭齊詫速斜懸倒挂比猿猱橫身更以竿摩腹復
有快船紛如麻名爲護龍森矛叉葺城俠少好身手各
逞長技交相誇須臾日落龍舟卸細柳纏頭口瘡啞舟
沈野港人始散我聞此俗尤堪詫此俗江湖傳已舊淫
風最是吳人狃枯槁忠臣不可招娈娈少女安能救今
春連月雨不收大小麥子皆無秋急宜插秧向田頭何
爲輟耒事嬉游當年元江陵作詩諷競舟岳陽刺史賢
百舟一不留我作此詩非夸稱亦欲竊比元江陵

五日憶龍舟競渡歌

張學林

我生二十九端陽十有七度客四方江鄉風物匪所詳
時聞父老談滄桑在昔殷富排歡場龍舟五色紛朱黃
斬王廟前風飄颺波濤怒吼鬚鬣張沂潮上下吞晶光
尾高丈二兒繡裳一躑擊破江滂洋兒登船頂索繫兒腰與江面平陡墜
下觀者驚譟畫舸列觀拍手狂購以鳧雛勞酒漿一日之費

千金彊海氛一擾民業戕六十年來事渺茫我聞斯語
情慨慷太息陳詞父老行我昔十載西湖旁年年競渡
祈豐穰亦厯蘭陵經吳閫水嬉雜沓遙相望繁華到處
殊吾鄉吾鄉何以偏凋傷亦嘗蒿目私忖量三吳戶戶
勤耕桑講堂午夜聲琅琅鳴機軋軋宵未央舟車萬里

浮糗糗四民力業披星霜一日游燕終年忙吾鄉坐懶
入膏肓掉臂城市騰脣槍無稽一聽羣沸塘貧窮到骨
恣徜徉百工鳩拙空郎當士人讀書昧漢唐駢頭鬪葉
一室藏百錢勝負爭搶攘子弟玩愒居諸荒天不雨金
更雨糧誰能赤手盈倉箱江河日下心徬徨父老領首
情蒼涼予言砭疾藥石良何時簫鼓徵樂康

中秋山塘曲

王撰

秋江雨霽收煙霧畫橈齊向山塘路山塘簫鼓正喧闐
貴客維舟寺門樹船中載酒嘗百罌日斜月落興縱橫
傳說連宵競開譙十部梨園選應徧歌按霓裳舊譜翻

舞飄翠帶紅粧炫珠簾露腕袖輕旋蕩子回眸拾墜鈿
吳兒生死歡場裏那管人間水旱年君不見野漲連天
浸茅屋十家五家相向哭催科大吏下江南不辦官糧
來顧曲

輿地類

和平吟

按和平縣屬惠州府

尹惟日

古峒踞雲山寸幅難爲地從無大鄉族焉有衣冠第改
邑百餘年往往好攜貳昔賢憂患心文治兼武備不然
荆棘中何以設官吏反覆今無常殘者已憔悴設誠安
全之族類猶我異况乃橫迫呼一朝三檄至益以無名

派捧讀徒流淚愚者死官法鬻賣及童稚黠者奔鋌鹿
狼狽爲規避蠻長更桀驁遠忘冠履義事固不可知揭
竿其故智嗟嗟粵多難輓輸勞當事大小七十郡貢賦
原一視和爲蕞爾區存之亦如棄剡盡一年肉不供一
飧費無補軍國需徒爾遭傷諍連洄古巢穴嶺控惠潮
臂動輒煩籌畫往事言猶悸內憂外未甯奈何不加息
我不擇南州投身禦魑魅去國八千里瘼心言撫字
王事方勞午焉敢告勞勩但得減一分民受一分利痛
哭亦多言我固在其位

朗陵行

鄜城以南數百里盧舍蕭條
田野不治歷數十年矣感賦

馮廷樞

荆河惟豫州厥賦實第二汝南天之中亦屬中上地漆
絲旣繁興纖絮以時致洎乎井牧荒農民乃多事或爲
旱澇侵或因兵燹棄阡陌分錯陳溝洫久廢置朝廷重
稼穡特設牧民吏厚以賜復恩重以荒田議匪惟念民
依亦將收地利豈知羣有司相視等兒戲荆榛翳邱隴
瓦礫羅市肆我欲呼流民裹糧千里至相彼高下田畀
以耕耘器播穀居其始種菽及其次三時課晴雨豈曰
非善智惜非勸農官懷此終何試

隰州雜詩

錄四首

錢以塏

河東郡之西迢迢三百里思深哉遺民俗猶伊耆氏勢

實蒲翟偏土非絳沃比險不通舟車樸鮮習工技陶復
陶穴間古風良可喜但勿爲繭絲庶幾結繩理

山氓少機巧所習惟耘耔高原無灌溉甘雨賴及時往
往春夏間偏苦霖霖遲寒威又獨蚤秋半草木衰未及
實堅好霜雪摧殘之況乎山地瘠揮鋤石累累縱令雨
暘若未可籌車期誰能哀憚人但望蒼旻慈歲歲大有
年庶勿嗟化離

人丁分上下有丁苦無田算緡但計口不問陌與阡當
其催科時悉索最可憐土窰一破甑棄之遠播遷人去
丁不去籍在焉得蠲鄰里代之輸展轉相株連及其歲

已久。他鄉長曾元。忽聞踪跡存。重趼斂丁錢。我欲除此困稅額。防虛懸。繪圖效鄭俠。憫此災獨先。

民居似蜂房。穿壁爲營窟。其外低作垣。遙見牕戶列。老翁負薪歸。嶮巖行蹶蹶。少婦遠汲水。深澗瓦罍挈。山坡牧牛羊。小心視飲齧。晨驅驢轉磨。晚呼雞棲桀。卽此誇富饒。其餘蓋藏缺。豐年穀價賤。人仍飽糠粃。春韭與秋瓜。客至乃特設。風景總蕭條。可知民力竭。亟宜噢咻之。任詔陽城拙。

洪州
吟 龍沙讖

羅安

白沙蜿蜒如龍行。支肢迴抱依衙閤。西蜀鹽山移置此。

日影摩盪生光晶昔人是爲登高地初從崕嶺至崕嶺
地祇孕育詔靈異剗削復長神所合真君識記一千載
元風重振沙踰城奇哉此言今果驗突兀勢與雉堞爭
共謂神人應候出誅屠蛟蟒救蒼生沈江鐵鎖可更鑄
八百弟子龍沙盟我思神仙本荒誕郡邑保障繫匪輕
茲卽俯窺城可越豈無盜賊爲游偵願告長吏慎防守
勿信奇袤杜奸萌

題寶慶圖經形勢疆域篇三首

宋翔鳳

讀史紀方輿其要在用兵古今列成敗綜覈皆分明茲
雖志一郡山川亦縱橫遠接黔苗悍近雜民夷情况界

楚粵間形勢有必爭。尺步算疆里。高下識險平。我先得
數卷開卷意已傾。非具域中見此書。難許成往事。太潦
草近賢信專精。粵西動小醜。不獨徒御驚。卽時正擾攘。
按此自有程。

瘠土人向義。古人已言之。城步萬山間。地闊田難畱。十
里僅有人。居室多茅茨。夜行絕燈燭。日食無鹽醯。有田
收數斛。卽可稱高貲。甘心守賤貧。不惑雜亂思。窮鄉戶
不閉盜竊。人莫爲所以宵小徒。勾結不至斯。茲邑號煩
劇。爲地臨邊陲。至於論人情。醇朴真易治。所恐久變更。
衰盛防隨時。

八排在連州羣獠所巢穴其中大縣互入者不能出百
穀產皆足五兵利無匹遂爲逋逃藪敢避法令密周防
誠所急駕馭費多術全州與連州行省隸非一相去千
里遙經涂數旬日亦有五排名名近不同實散作十三
地險阻容竄越盜鑄與私販此類稍難詰卻異獠砦固
猶可鞭箠扶

春陵行

周 凱

四座且勿喧聽歌春陵行春陵昔殷富民樂織與耕開
箱疊羅綺開倉羅米穀白水足魚蝦青山產竹木戔戔
光武廟歲時民祈福老守鄉里居幼課子孫讀大編從

何來嘅自秦至楚既有黥面徒復有饑腹賈其心貪似
狼其狀號如虎緩急苟有需倉猝爲所蠱始惑美言甘
後墮奸術苦東家質馬牛西隣質田畝奚啻利三倍十
子權一母子母權不已。逋累那能贖田畝仍爾耕馬牛
仍爾牧。彼自取盈餘。爾譬爲奴僕。廣廈讓居處兒女遭
折辱。昔補眼前瘡。今成几上肉。秦人何軒昂。楚人何困
蹙。長官愛爾民。下令客民。逐慎勿便利貪。再受秦人毒。

陽關行

用元道州
春陵行韻

許乃穀

敦煌爲漢邊郡我朝自雍正三年設沙州衛遷
關內五十六州縣民人凡二千四百餘戶以實之
旋改衛爲縣辛卯秋余由疏勒還泚敦煌兩度兵
差十室九空積欠倉糧三萬餘石且金山采盡官

則連年賠課黨河水淤民則灌溉無資上下交困計惟有濬水源搜地利以治其源而已作陽關行

一人開明堂三公和鼎司小臣宰西秦五載無寸施脫
身花門還肯作岑參悲敦煌漢雄郡徙民民忘疲揀金
貢天府地肥扶人羸山空金今盡如豹徒畱皮西極
田曠乾逋欠奚由追况有沙礫地苗苗期無期吾欲濬
水源集眾荷畝隨地利弗禁搜囊空有餘資賦緩丁不
逃氓蚩恩自知作歌元道州憐元杜拾遺千載結深契
惟荷皇天慈不則事鞭撻能爲奚忍爲先子捐俸錢先
光牧黔西州曾捐遺型謹奉持恃人非恃法此意當告
免民欠三千餘金誰江南賦稅重日用計權宜秦中賦稅輕豳猶支移

宋史移此輸彼移
近輸遠謂之支移
苟能裕其原輸將肯後時
士豈志温

飽吏合籌盈虧會須百姓足感激見情辭

平灘行

漢陽大商李本忠赴歸州請於州牧曰州

心竊痛之願出貲募能伐石者州牧可其請州
灘以平又走蜀之夔州一如請于歸州者皆得
請君既去諸灘石又以楚舟沂江而上必用挽
夫數十人負絙走則勞間恆失足顛墜死乃鑿
崖通道以利其行始嘉慶乙丑訖道光庚子凡
平險四十有八費金二十萬蓋曠世義舉也楚
蜀有司聞于大吏以上于朝本忠及其子孫
茲膺四品章服之錫或撰其事願末名曰平
灘紀畧余更以是詩發其端

李旃

五丁力大穿秦道餘力不肯平巴東蜀灘之害亙千載
今日乃生李本忠本忠世世爲蜀賈心痛祖父嬰其凶

仰天泣血發私誓波神退立灘神從夸娥負山寓言耳
誰知世有真愚公瞿塘灩澦伏馬象忽驚一旦蒼棧空
當其熾炭頑石裂火光下徹馮夷宮椎聲丁丁徧崖谷
夫役擾擾團沙蟲夔歸諸險次第盡人志一定天無功
古來賢達入蜀出蜀豈云少顧此無策但覺心忡忡丈
夫行事闢萬古如君此舉誰能同蜀江覆舟昔無算夜
深鬼哭搖江楓似悲生世不在李君後乃使白骨黑石
相磨礪君不見今日夷陵連峽岼峴荆大艣行不斷長
年高歌估客眠逢人都頌李凌漢

本忠字

招寶山放歌

徐 榮

君不見浹口江寄奴大艦排旌幢長生人潰水仙走築

城置戍來句章

劉裕擊孫恩於浹口

又不見巾子山行人斷舌懸

高竿越國樓船出東海天上白虹翻紫瀾

張越公世傑度宗時爲水

師統制次定海元將合都統下彪說之降公斷其舌磔於巾子山下

朝潮夕汐敗人世豪

傑相望異遭際臨山破直亦論功姑渡擒倭還就逮俞

大猷破王直於烈港臨山又斬倭寇三百餘人於小姑渡胡宗憲劾其縱倭逮詔獄疏辯得釋

雲中樓

櫓鬱參差都督威名蛟鱷知

盧鏜爲總兵始築威遠城於招寶山上

天險

尙傳盧氏壘海烽爭避戚家旗

戚少保繼光爲鎮海總兵倭人望其旗輒避去

英雄事去青山在重見龍旂照瀛海鬼皮韉軟馬繮腥

登騎一軍齊喝采

辛丑六月鄉人獲夷鬼二名送軍中裕節帥謙剝皮抽筋令于眾其奏疏

有云活剝其皮以爲奴才馬傳聞倏敗五羊盟廈門險

失全閩驚

夷人在粵和約已成忽復敗盟

福建廈門七月復來浙洋 滄洲血戰凡

六日絕盼竹山無救兵

夷人攻定海陷三總戎死之參游以下死者三十餘人竹山門

自鎮入定之路

救兵只在蛟門西雲屯招寶分金雞悲笳沸海

風月湧列帳連山霜雪低早潮忽打攔江岫火輪飛過

蟲沙散傷心地上走元戎空有蘭筋無款段

夷犯鎮海招寶山威

遠城金雞山守兵皆潰提督余步雲下招寶山威遠城入縣城裕帥退保甯波提督亦奔甯裕旋自盡

頭落照新山花又報太平春我來只灑潮頭淚此是古

來征戰地

小潮音洞作

在招寶山後路極險仄逼臨外海內鑄此洞名又

招寶南來面回顧。腳插海心無去路。忽聞洞口接狂潮。呼吸天風有餘怒。風怒潮狂霹靂驚奇兵。已入威遠城。

將軍棄甲督師走倒海。翻江聞哭聲。

注見上。○夷人一艘攻招寶山南面。

一艘攻金雞山北面而潛以小舟由此洞上山入威遠城。又以一舟由沙蠟嶺攻金雞山後。是以俱驚潰。先是鎮海城外鉤金塘設四礮可防此洞。上山之路余見其險要。白劉玉坡中丞添設大礮三門。及裕魯山督師來令江蘇黃太守守金雞山。乃謂鉤金之礮時平仍見橫無用。盡撤至金雞山。夷人後竟由此上山。雲堞我攬藤蘿有餘惜。雲影懸空路似繩。海光潑眼身如葉。往事空傳六國來。平倭勒石亦雄哉。不見周嵩出下策。定知李勢是奴才。

洞外左壁刻六國來王處五字。右壁刻平倭第一關五字。大皆

二尺餘所署小字。苔蘚不見。志云王安石書。無可據。當是俞大猷盧鏜諸人所題。

晚潮拍面催

歸屐南望金雞增歎惜一樣飛來沙鷺旗臨時不得郎
機力奇奇正正古來聞爭遣排成一字軍已看金湯重
部署莫令風鶴更紛紛頂辨善後工程余囑以留意鉤
金塘今已築海成隄可安大礮
一十九
門矣

總論政術

蔡誠向

粗舉國是可施於今者分
疏九章燦竊比葵藿之誠爾

黃子雲

冠裳定章程先王位上下近者私人子檢閑漫陵駕日
曜羔裘朝春生錦衣夜綠幘傲金張紫羅埒王謝招搖
過里門揚揚自高價咄嗟彼何人采章敢濫假由來服
不衷邦家係風化章采布德音品制禁踰跨權衡著爲

令違者法無赦。秉茲姬公禮。炳煌昭中夏。

荒服若四體。華夏互當中。

王道日昌熾。萬國咸來同。

蠢爾東方夷。負固爲島雄。深維柔遠義。不責包茅供。小人志罔利。市舶反交通。官司且有言。泉幣資其功。湯治莊山金。禹鑄歷下銅。洎乎秦漢後。未藉海物充。飛龍運乾綱。援手於魚蟲。嶺外盛金沙。往者曾銷鎔。近知滇南礦。足以給司農。寄語行化臣。遏絕無從容。不聞商旅入。驅之如僕僮。堂堂大國威。祇需一丸封。

事非興作難調劑。貴帖安毋謂有成憲。紛更厭叢脞。戍卒滿寰區。昇平習游惰。糧粒瘡痍肉。恣餐白日坐。前哲

籌計謨土田分種播耒耜則負耒耜夕則望烽火旣節度
支耗又乏宴安禍獲禽當縱輕開帆當振柁充國與葛
亮營屯計非左

惟王立中樞財貨靡不有虞絃歌南風要我民阜殷
周徹助外一一歸黔首關梁供膳服所賦時或偶宏羊
起利途征鹺兼權酒罪實萬世魁法迺百王守津吏益
措克緝算及箕帚裕國理果然通商意則否敢法西岐
前勿踵炎漢後民生食飲需毫髮莫橫取曾聞周祠部
變疏奏同野叟災郡稅已弛仰請行諸久竊惟征商義
惡其望左右蹊田而奪牛毋乃傷忠厚

王者圖致治。致治賢爲寶。草野不乏才。辟舉何鮮少。漢
家令郡邑。推籍升京兆。以此行黜陟。引領多奇抱。近承
詔。屢頒下。應徒草草之。官凜考核。惟務催科早。茅茹間
一登。行誼未深討。銓曹所甄別。應對與儀表。於身取瓌
偉。晏嬰軀則小。於言取辯給。周昌口難道。宣聖於予羽。
不能無悔懊。奈何中材人。臧否一目了。伏惟責守令。諮
訪察孤標。親疎苟矢公安在。以身保薦賢。爲課程。自爾
官箴好。失實者免秩。稱 旨者上考。朝有推讓臣。士無
窮約老。於皇文武勛。菁莪美豐鎬。

閭里游閒兒。白日競紛逐。柳絮冒春風。飄颻一無屬。出

門媚冠裾衝筵議梁肉宵分竊虎符酒半挑琴曲風行
江上下綿延漸成俗此實長奸回烏能廢箝束明明法
六遂鄮鄙各糾督某也攻誦絃某也任耕畜其有不圃
樹其有不市鬻胥先木鐸警承復蒲鞭辱興行期十年
會見醇龐復 宗社鞏無疆幅員封比屋

卮言

六首
錄二

袁枚

官以阜兆民。貴在知民風。所以漢守令。旌旗故鄉紅。貞
觀分兩選。一西而一東。毋過三十驛。政和道猶同。元明
有衰政。探符以爲公。章甫適越俗。燕縛爲胡弓。嗜欲不
相達。言語不相通。出都爲債帥。臨民如聾蟲。方知古賢

法。妙在人情中。先期而除弊。其弊方無窮。

常讀聖人書。恍然明治理。富之與教之。不言其所以足。兵與足食。亦不序原委。吾其爲東周。期月而可矣。學校井田。方一字不挂齒。唐虞命皋夔。欽哉兩字。爾大哉。聖人心。堯舜同孔子。我但責其效。設施聽之。彼彼之能與否。惟在我所使。孟軻談王政。漸覺聒兩耳。後儒更紛紛。拘牽守故紙。常平倉最佳。東漢弊蜂起。車戰古最精。陳濤敗如洗。民靜政轉繁。人活法先死。宜乎三代風。戛然亦竟止。

讀

詔寄都下諸侍御

嘉慶癸酉

陳文述

木從繩則正后從諫則聖自命非稷契何以事堯舜嘉
慶歲癸酉季秋實秋閏小劫應星彗大憝起佚俛三輔
旣伏戎九門幾犯順上賴天祖佑下資文武奮首
惡雖藁街餘匪尙列郡根株始交豫滋蔓聯齊晉大帥
貔虎營諸將鸛鵲陣皇帝上聖姿下詔勤清問罪已
示惻怛求言篤忠藎賢良劉蕡直治安賈誼諍諸君列
臺諫宜有尺書進毛舉與癥索非以答明訓所言頗
不誣請得肆其論

漢道昔隆盛未央起鬱律唐室方熾昌驪山九成出皇
居示壯麗茅茨亦奚必本朝家法厚匠氏悉傭值勞

民民忘勞臺沼成不日左壁書幽風右展書無逸刑徒
奸易藏水衡源懼溢防微古有訓所宜言者一

西京創樂府協律制未備梨園出唐代本非盛德事吳
百矧靡曼動心亦蕩志其權竝鹽權其勢聯宦寺外廷
動熏灼內府耗恩賜失志易怨望得意滋流弊矇腹掌
律同和聲襄上治端冕聽虞韶會見鳳皇至待詔皆賢
良所宜言者二

六曹綜治理流弊百不堪胥吏虎而翼四顧心耽耽法
律隨所操文網任所探高下在其手出入由其領窺禁
伏如鼠食葉噴如蠶大吏坐畫諾有律何由詰遂令蕩

平世險阻生嶮巇。刪繁就易簡。所貴精心覃。蕭規而曹
隨。所宜言者三。

天庾國正供。轉漕關大計。國事與民生。今日極流弊。論
治不清源。艱鉅何由濟。潞河運舟集。積習固根蒂。運丁
苦郡縣。橫索不可制。郡縣苦百姓。浮濫莫敢議。雖有賢
父母。空抱愛民志。豐年亦任行凶札。恐難繼治道。豈其
然。正坐無術耳。琴瑟宜更張。所宜言者四。

漢代武功爵。空名在官府。不聞通籍入濟濟。有如許監
司。及牧令。遑復論門戶。遂令天下才。氣懾守錢虜。力不
任農工。才不逮商賈。一行始作吏。此意亦何取。上官樂

趨走遑復問良楮古來程卓中焉得有召杜一卷黨人碑反覆作雲雨安民在察吏所宜言者五

名者實之賓其理筦經曲是非既顛倒情理亦反覆定制設養廉卽以代常祿所以畜妻孥兼以參僮僕今之養廉者實給尙不足進一出以十羨餘紛名目無一不攤捐追呼肆公牘上下互相蒙何異勸貪黷所以文網密無異濕薪束六計重周官所宜言者六

讀書所見

汪大經

古寓兵於農惟農卽爲士橫經與負耒原不分彼此後世兵農分士亦各異視自詡曰儒流鄉農屏弗齒不知

國朝詩集 卷一
伊呂傳舉不在城市。

治國如治病十全爲良醫其病苟沉痾良醫謝難爲寒暑偶見侵豈無藥可治乃謂勿藥喜痊霍知何時癰疥養癰疽厥咎醫莫辭。

詠古

錄七首

蕭掄

選舉非一途立賢古無方維昔漢武帝其臣號多良宏羊賈人子十三侍中郎卜式進私財釋屨登廟堂至今班氏書列傳垂煌煌天子欲用人何必由膠庠應運材自興得勢名益彰博士諸弟子黯然而無光

天子無私財利與萬方同百姓苟富完不憂國家窮漢

當文景日宛然三代風武帝置平準計出桑侍中宋當
眞仁世治亦幾郅隆神宗用新法將求國用充閭閻旣
耗損左藏終罄空何如去計臣恭儉法祖宗

畊田行周世耘耔見雅篇區田此遺法本自后稷傳樹
藝古有教民乃慶豐年後世郡縣吏惟操賦稅權目不
見耕穫足不履陌阡漢代猶近古農桑課自官汜勝著
要術趙過教代田

桓寬論鹽鐵說亦不可行聽民自煮海適令豪強爭國
家大利孔必上持其衡宜於出鹽地計數定額征官惟
收一稅吏不用多人民皆得轉販商詎操奇贏界除遠

近限鹽去官私名行無憂壅滯價亦得常平劉晏知此意唐世號能臣此事雖微濫利亦在官民

元人都燕薊漕轉東南粟海運患漂沒河行苦不速當時建議臣本計謀殖穀七十二直沽引之灌漑足其旁地勢寬墾之土肥沃因令諸富民量力農事服往募吳地民竝仿江南俗築圩興水田種稻兼種稔一年利初開三載倉有蓄因視所墾地計功授官祿此誠大議論能造蒼生福當時說果行冀州大豐熟轉輸可漸省斯民元氣復敬告有位者盍取此書讀

明開會通河轉漕由此進獨有邛仲深言宜兼海運河

身旣淺狹歲煩役夫濬衝壞防黃流築隄護尤慎當其
銜尾時邪許聞遠近但覺勞民多未見程途順海道似
迴遠雲帆達轉迅漂溺雖足憂省費差可信并防河道
梗藉以通饟餉斯言誠良謨足備當宁訊庸人守故常
臨事多瞻徇烏虜爲大臣安可無學問

富貴上所操用以奔走人人求富貴不得勢必爭聖
人知其然權乃寄之名君子秉大義千乘可以輕小人
畏清議四維束其身風俗由斯美國本以不傾後世隆
斯道翳惟漢東京降及典午朝名教棄如塵相矜以貨
財王愷石崇皆大臣變亂須臾間懷古傷我情

蕘言呈林少穆撫部

吳嘉淦

設官各有職，盡臣獨賢勞。往者值履歲，居民慘鴻磬。公時握刑篆，怒焉心憂忉。畧仿鄭公法，善政窮秋毫。賑恤務實惠，井井羅科條。迄今碑眾口，名若華袞褒。江淮昨大飢，洪波無禾苗。餘災被蘇郡，撫字期同胞。

公去民重憂，公來民色喜。孰是父母心，而不慈厥子。比戶食爲天，近頗呼庚癸。市肆半居奇，穀值增不已。動言來無方，實藉牟利耳。公心定惻然，輕重揆事理。勸諭量平減，升斗卹閭里。勿令市儈流私智，逞譎詭。

有唐相楊綰，京兆滅騶從。以身率羣下，儉德足箴諷。郡

邑豈無才名節咸知重上下互相市閑檢或弛縱清望
眾所欽文簡相伯仲先聲懾僚吏夸詞絕諛頌朗鑒虛
堂懸燭物自空洞翼黃大有人一出爲公用

四民士稱首賢者葆恆心餘或累身家貪縱乖前箴道
在養廉恥待之異黎黔絀辱偶一加終身慚影衾公來
作矜式度量何淵深董勸有良術毋俾卽怙淫戕戕泮
璧士終當貢南琛

蓋公昔有言治道貴清淨利弊不滿百勿輕變法令蘇
民久恬熙柔脆少剛勁風俗或驟易勢格慮難勝知公
善因時太甚去其病餘惟事休休涵育遂物性大吏有

德度民志肅以定。不競復不絀。邦人仰新政。

善政

三不朽詩

高滄有鬻妻治母喪者其妻往誓死不食因訟于令令爲出俸錢使歸之

陶澍

親恩如天淪於幽泉嗟爾寡妻胡忍弃旃從義所重促音絕絃促音絕絃人誰不爾憐

所天惇惇剜肉自療傷哉何心忍卽於黜視天蒼蒼視水浩浩鶚面截耳庶以云報

罔極者惟親從一者惟身微二人之故孰知我侯之仁吁嗟乎千春

熟西北

周 篆

三吳不薄徵私家何由足公室無積儲薄徵未可卜蓄
積非無因。在生西北穀。穀亦豈易生。生從棄地熟。此絀
彼不贏。彼伸此可縮。用意鴈鳩平。豐亨如轉轂。大驅游
惰民。終身入檢束。非惟益正供。亦令實其腹。萬古鰥鰥
場。罔兩和鬼哭。一旦風雨時。蓬茅成菽粟。取一豈爲貪
餘九恩已渥。何用費不訾。舟車遙督促。

浦風行

爲邑宰德符彭公賦公宰海上時督郵有東海聖人之題每疾風暴雨戒輸糧者勿

渡浦防覆沒也後之邑宰嘗以嚴限致民有溺者因憶公善政作此唐 采

浦風拔木浦水立我思聖人能不泣怒濤如山千尺飛

輸將絡繹無虛日君不見彭公作宰稱神明海邦善政
聲錚錚公誠撫民民自服微輸甯用相催促吁嗟黃浦
真無情蛟龍突鬪鬼神驚煙雲貼水白日蔽沙礫亂飛
危閣傾石壕之輩氣如虎斯時猶欲鞭糧戶糧舟葉葉
爭西渡不畏風濤畏官府六十餘人同一時身葬碧波
誰救取至今青燐渡口飛啾啾哭向黃昏雨

營無逋

潘耒

長刀垂腰臂蒼鶻走入民家氣咆勃婦女蒼黃男股栗
問此誰何索逋卒營中舉債誠大難一母十子何能完
賣兒典女苦不足坐令平民骨髓乾中丞念之中心酸

顧謂吾民渴不飲毒井饑不啖漏脯營中有債慎勿舉
顧謂汝卒汝爲天子守邊將軍號令嚴如山汝螫吾民
不汝赦憐以汝券來汝無苦民貧莫償吾償汝出金於
府焚券於庭自今兵與民各收爾牧耕爾耕脫復出入
債時則有大刑霜稜稜日杲杲街頭歡喜營中惱寄言
營中勿多惱天子聖明汝行當念公祝誦不可了

縛市虎

又

山中有虎白額爛斑磨牙擇肉眈眈草間市中有虎不
翼而飛無晝無夜搏人以肥山虎尙可市虎殺我一虎
十俵動輒構禍白日當天心百怪宜潛藏至仁雖解網

肯令虎陸梁爪牙豈不利虞羅已高張搖尾甯得免磔
裂謝豕羊一虎去一市喜百虎除百市理騶虞來遊鳳
來止甘雨祥風樂甫始

吳興太守行

丁未春

上憫湖郡之災緩漕運粟

且失限煩有司徵求一呼罷民輒延頸就鎖扭至
提以大杖不顧以爲杖而死同飢而死也太守江
都唐公惻然恐絕百姓以負天子命乃下令停
征民欣欣走相告余隸學官弟子職在宣德抒情
爰仿少陵次山二家春陵行體製

作吳興太守行以俟采興誦者

姚世鈺

唐公多美政第一惟停徵能將一葉蔭遮徧湖州城湖
州本水國旱潦頻相嬰上司入奏報 皇帝蒙嗟矜救
災議畱漕振廩開常平奈何春夏交雨點天瓢傾二麥

悉爛死原蠶又無成縣吏夜催租打門雞狗驚不食三
日矣失限罪所丁民實畏官府民豈甘敲榜可憐饑饉
迫始覺性命輕是時三伏熱觸暑如遭烹厓羸縣門集
縣官醉方醒平頭搖羽扇輕風來清冷翠瓜切片玉朱
李沈寒冰巍峩坐堂皇鞭雷車砢砢扑扶臀無膚老耄
難逃刑何來朱書符傳自太守廳吏胥捩眼窺顏狀變
生猶逝將焚如死豈意脫然生退衙遣歸農閭里歡相
迎忍飢幸少安兩月寬作程鋤禾分辛苦補救期秋成
何以報太守請歌吳興行不願公三公不願公九卿願
得長借公流澤茗溪清百姓樂復樂受福唯 王明

三善詩

乾隆壬辰歐陽蘭畦廉使奏請禁革江西停葬溺女錮婢三事作是詩以誌公德

蔣士銓

冢人掌兆域大夫掌族葬年月各有制封樹戒相訪焉
敢擇邛陵而蒙拘忌誑枯骸求富貴人子心久喪遂惑
青鳥言百計營一壙葬者恣侵盜不葬成坐忘藁裡或
難求骼鬲豈無恙民愚士夫鄙停匱屹然向堂存數世
棺顙泚盍惆悵於戲歐陽公蒿目默悽愴赫然具封章
論列陳事狀頽風倘能移結草安可量

吉夢徵虺蛇璋瓦詩竝美如何女子祥耶孃仇敵視呱
呱離母身若以石投水殺之不須與宛轉盆中死耶如

鴛鴦羅孃若摩登鬼禽蟲重胎天何況出毛裏充此忍
毒心賊害將何止於戲歐陽公幼幼憐赤子勅罰申厲
禁科斷及隣里生男名召杜生女例同此類風倘能移
盡與歐陽氏

司隸掌奴婢罪人本無多媒氏判婚媼恐傷天地和德
裕鎮西川鬻婢分條科三五列年限歸贖除煩苛韓柳
守大州脫兔離羈囹怨曠苟不形豐樂登嘉禾陋俗錮
老婢誰得操斧柯兒女繁成行厥父爲誰何李沆放青
衣鍾離嫁媼娥古來盛德事奈此冥頑那於戲歐陽公
開籠縱鸚哥陷井旣解網一一松依蘿頽風倘能移女

貞樹婆娑

典牛歌

又

賣牛圖就延牛命富家忽下收牛令牛來便給典牛錢
有錢來贖牛便還長者之門萬牛託窮鳥投林水歸壑
可憐穀穀得全生牛僧耽耽不能奪天心轉處雨陽時
農夫稱貸爭贖之離妻歸室逐臣反再服犁耙游東菑
一家典牛萬家笑積穀如山不肯糶甯將剩飯飼雞豚
未許飢鴻乞梁稻吁嗟乎爾曹自作多牛翁豈識銅山
轉眼空從來水牯能成佛何苦輪迴牛角中

修養濟院

唐仲冕

王政憫無告宮覆大帡幪計口授厥餐鯁寡靡不容年
深鞠茂草露處號淒風長官治其解亭館開玲瓏此屋
乃不修諉曰金錢空我來趣召匠吏白籌先備冊籍申
臺司稽覈常相蒙我言百餘命惟賴一畝宮稍逼霜雪
緊半填溝壑中爰令鳩衆材親與規百弓牆垣築堅固
渠澮疏周通分門別男女比舍戒祝融侏儒曳斷者瘠
蠶扶瞽翁相將就衢巷笑語忘龍鍾鼓腹午炊白曝背
朝瞰紅安得千萬間安集無哀鴻一夫恐不獲在宥仰
皇衷小臣力其職豈必財用豐

屠琴鳴美政詩

君宰儀徵旣治姦尤思裕其生計捐俸治紡織具勸農桑民化之

顧 蒞

眞州鹽賈集利在風易澆四圍濱大江荏苒匿輕舫生
涯在私販出沒乘風濤愚民惑所誘子還遭我狴甘佩
牛與犢遂令鳩變梟黃金攫白晝過者莫敢譙屠君下
車始歎此莠亂苗五家各相保四民俾勿淆燭微形在
鏡令速風奔潮渠魁已就縛翩翩傾其巢邑中走相賀
堂上靜不囂慨念羅網者豈不惜膚毛無業遽至此况
乏官甄陶緬想幽俗淳閭中化先操春繁秋荏葦瑣屑
籬甯勞今有絮使擊今有絲使繰綜柎旣素講牽挺亦
預料郊野忽改觀逶迤桑麻交崇陽益藏富襄城著作

高君其行勿怠。二字名同標。

前溪新樂府

爲林小溪
大合作

朱實發

散米廠

放米設廠分四鄉。一鄉十廠隨其方大口小口相扶將。
手持賑單一尺長。硃紅官印鈐中央。姓名男婦登記詳。
廠中分別東西廂。男東女西限以疆。一升一斗皆平量。
米如珠白無糲糠。領米歸去午飯香。竟忘人世有饑荒。
董其事者紳與商。不使胥吏參其旁。官也時復來登場。
饑民鼓舞富賈泣。不得居奇賣一粒。

禁石宕

開石宕斧鑿之聲驚天上開石宕玉卮穿破使無當縣
南一帶山延綿藉爲一縣之保障奸民牟利賄其官官
受其賄隨所向朝採石入幽壙暮採石登列嶂有如一
人身剝剝到肺腑坐使四境元氣皆凋喪長繩繫其匠
對山加箠榜朱書栲栳立禁狀永保山靈得無恙山靈
無恙民陶陶使君之德如山高

葺窮屋

東支西拄幾間屋風雪猛來屋欲哭居其屋者孤寡獨
腹內僅有半盃粥身上并無兩層服如此穿漏那可宿
官來顧之慘心曲嗟爾人兮不如畜急召匠氏來其速

庀爾材植其圯者起其頽破者補之薄者培窗櫺糊亮
白紙裁階除掃淨無塵埃前者墮寒谷今日登春臺那
怕風雪將人埋

除漕蠹

一十八都數百莊

通縣十八都每都又分各莊

莊戶運米輸漕糧漕

中有蠹神趨趨軀幹蠱立性強梁包攬各都米上倉有
不從者遣之殃奪斛不許官平量少不遂意勢蹶張能
使一國人皆狂以理論之頭更昂此蠹不除收無方除
蠹有若除犬狼縛之以繩丈二長大杖杖之臂生瘡瘡
起決配投遠鄉從此漕倉肅漕政更無一人敢恣橫顙

粒不浮民不病一十八都皆奉令

林少穆中丞治蘇新政詩以紀之 胡敬

姑蘇財賦地賦出由田疇田疇之所關水利宜急籌太
倉有劉河歲久廢不修治蘇昔置吏賢數夏與周築隄
復均稅心各民瘼求公能舉其廢借帑工爲鳩方今捍
海塘深繫江浙憂澹災朝發帑星使雙槎畱浙西界江
南形勢大畧俾左江右太湖支港中紛稠惟杭盛潮汐
海翕波逆流嘉湖接杭界均控蘇上游疆雖別統轄水
濫同一漚所以唐宋前嘉禾隸蘇州正須將伯助指臂
效互收側聞洞庭石開採行汎舟及茲霜降後潮縮沙

不浮程工貴協力迅速芻蕘投沿海盡桑麻無俾蛟龍
游劉河公著效匝月役已休塘工以歲計助順知陽侯
蘇兼得保障鞏固期千秋

海虞足風景邑以虞仲名中有白茆河沙礫堙欲平一
朝具畚揭河已瀏其清從民所樂爲功不勞經營因公
治河續令我愾喟生杭城東帶江西拓明湖明人言濬
西湖瀕海田可耕不知南湖浸流繞餘杭城源自天目
來於此滙一泓前明事疏濬萬頃波盈盈邇來日蕪沒
彌望皆榛荆其半成膏腴計課官糧征上流不能瀦水
乃與地爭因之吳興郡傷勞頻呼庚豈惟病吳興蘇亦

患匪輕。法宜疏。下游上始功可成。漣流與導委。兩省須
合併。望公福舊治。通力徐施行。白茆河積淤常熟紳士
請計畝捐資作工費中
丞率司道捐俸
以助一月告成

東南歲積歉。吳會尤顛連。公疏可載入。言行名臣篇。元
龍遺法在。采自吾鄉賢。此於公德政。未備僅舉偏。雖偏
澤無涯。百命荷一肩。勸如得百家。盈萬命植焉。吾鄉亦
設賑。量地糜各煎。當衝值南北。迤東及江邊。厥日賑萬
人。少亦口數千。男女區以別。界域蘆分編。疲癯在所矜。
送給任坐眠。大吏督賑來。冠蓋紛雲煙。憑籌次第給。魚
貫無喧闐。薄糜不耐饑。殘喘藉苟延。饑猶不遑救。遑卹

衣無棉日斜賑始畢空舍風蕭然呱呱聞啼聲中有嬰兒捐骨肉本天性忍棄不復憐棄兒或收養顧兒難兩全流民一幅圖振觸滿眼前自茲各村鎮爭散米與錢樂善人所同所憚浮議牽道在上爲倡立法開其先擔施法尤便遠免度陌阡今秋足禾稼鼓腹償力田救荒策縱善溝壑已半填天如軫斯民長資大有年

癸巳冬吳中薦

饑中丞仿明季嘉善陳龍正擔粥法挑赴各城以濟老弱貧病

國家設學臣士氣藉培養乘輶月采風無暇拓函丈間左古有塾書院由此昉輔學臣不逮鄉大夫所掌鵝湖與白鹿道岸深景仰後來東林社其失在標榜然猶氣

節存以直矯羣枉於今尙通脫風會更殊曩禿襟短後
衣儒也同僧駟威儀旣不飾文亦多鹵莽豈無媚學子
可待上宏獎卓哉名公卿精舍啟書幌才甄浙東西榮
比龍門上能於書院外別示化行廣遙遙小滄浪曾到
畱夢想水木何清華軒檻幽且敞公餘課生徒月旦評
不爽範如儀徵師春風隨几杖中丞擇書院中能文之士於小滄浪之清德堂課之月几三舉

仿香山新樂府三章

紀徐樹人宗幹
宰泰安善政

徐寶善

闊布謠

吉貝花非泰安出闊布歲輸一千匹闊布亦非出泰安

紛紛機匠織龍山布千匹出民間豪胥持牒入村落雞
犬夜驚人不眠一千匹布金三千脫卻布袴輸布錢徐
侯愷悌民父母民入布錢官不受官不受民氣蘇風饗
雪虐天寒日下有複禪上有襦

小車謠

車班班捉田間田間捉車應官府捉得驅將何處去衣
赭囚人絡繹來官人解餉從輿臺小車總向田間捉吏
胥火急官符催一車人出十車費搜括餅罌罄藏蓋前
吏鶚鷹飽後胥貪狼飢誰憐牽車人瘦骨撐枯皮噫吁
嘻歲無恙民無恙安得保我赤子如徐侯驛傳自捐車

百輛。

石路謠

泰安達長清石路迢遙百餘里高高下下石犖确軸折
輶摧苦行李昔我馬瘡我僕痛山路顛蹶嗟崎嶇如今
石路平且闊劇驂歧旁關政術石路謠行人喜使君必
平亦如砥使君福民民不知民知使君愛物慈願畱一
片青山石爲刻姚公紀德碑

卹幼行

楊慶琛

北風雪花厚盈寸樸面渾如寒水澌敗瓊裹體誰家兒
齒擊道旁訴窮困呼兒來前問以故兒言孤苦無生路

朝蹲廢寺夕破庵三五成羣觸風露我方蒿目傷毛裏
又聞斯語瞿然起恤孤懷少理云何一夫不獲深余恥
目之所及已若此勢所未悉知何似將兒飭縣妥安置
傳語縣官時畱意商之藩伯相會檄徧告湘南諸郡邑
歲自子月至孟陬九十日中饗殮給賃覓閒房作公所
十六以下皆就食慎選老役四五人管領諸孤防爭執
左餐右粥日雨巡布袴棉襦人一襲飽食終日無用心
未免觸目生荆棘或編栲栳或筥筐予以竹枝教學習
二月春融各散去酌給青錢使食力才技縱非盡人能
飢寒幸免向隅泣庶幾父母斯民心稍盡痛癢相關職

敬告後人追前修有其舉之慎勿失

五源行

唐鏡海剖符平樂於時楚獮不靖奉檄防守富川富川十三源之獮以耕作世其業

且有隨民籍入庠序者而宋塘三輩龍窩平市倒水五源稍麗獮不改蠻夷故習鏡海授以團練之方教以坐作進退尊卑長幼之禮咸欣欣然於是五源各建義學擇其子弟之秀者予以四子書村設蒙師以分授之鏡海一至獮童繞膝而嬉捧書而誦焉嗚呼楚南之獮既焦爛於羊泉粵東之獮又跳梁於入排亂有由來孰職其咎若得鏡海數十輩參錯其間以詩禮化羣蠻豈不盛歟因作歌以揚其事

湯鵬

天地虛靈無處無裸形繡面重師儒漢家莫仗兵車力
蠻俗全須禮樂扶君不見富川獮戶十三源山中耕讀
自年年父老揮鉏巖雨綠兒童采藻泮池圓箐密林深

羣種集五源未洗槃瓠習長爲異類大鼃醜喜遇使君
相感泣使君奕奕擅戎韜羽扇綸巾白氎袍草檄先飛
麟角筆整軍自舞雁翎刀努力戎行一儒服行行不辨
何谿谷四時苦霧愁飛鳥千歲崩植臥蒼鹿莫唱軍中
行路難解鞍據几有餘歡休休散帙投壺意舉舉輕裘
緩帶間羽騎如風卒如虎卻談文事不談武昔從虛室
問孔顏今見荒區變鄒魯五源子弟于于來摘環薤髮
歌康哉軍旅不如陳俎豆宮牆端可翦蒿萊書聲聽徹
粵西山山鳥山花樂意關不爲范韓驚破膽許躋游夏
各開顏君不見羊泉街上悲風咽妖狐亂領橫流血又

不見八排冲裏人無耕牙兵爪士太縱橫誰教守土工
文飾教養都非古法則山下平田强暴收山中左道童
孺惑揭竿爲患豈無因但請朝廷發勁軍鼠狐雖毒元
無策羆虎如炎來殺人鳳翼龍鱗勢可扳疆隅有事眾
呼譴競談李廣封侯易誰識文翁化俗難吁嗟乎使君
美政誰與儔至今椎髻沸歌謳村村閉戶談詩禮歲歲
生兒脫劍矛萬古尊親血氣同願推仁讓徧溪峒長教
瘴雨蠻烟地盡入春風化日中

鑄農器

嚴賊兵器爲農器鄉民捕送賊
盜者酒食銀錢外酌給數件

蔡學海

牛馬放原林劒戟鑄農器每誦此兩言躍躍如欲試數
年牧是邦私心勤撫字除賊以安民尙恐賊風熾捕獲
賊具多銷毀興民利耒耜爲之修錢鏹爲之置鄉民送
賊來長官酒食備賞需酌量頒田具殷勤賜思以淨賊
風是用祛民累

教紡織

鼠竊狗偷實緣游惰旋懲旋釋晝出而夜

各習一藝有紡棉花者有織布者有織屨織席者藝成乃釋之各有執業庶不至終於爲匪矣

鄉風每不齊莠者常聚散盡法誠可憐非種卻須斷思
量所作由游惰實居半忘善惡心生藐焉無忌憚往往
穿窬徒貽累徧閭閻收繫公堂上供食給錢貫命之習

一藝藝成乃釋案同爲食力謀庶幾孽可追嗟爾游惰民面目亟改換。

余民行

章大奎

至教本無類括蒼有余民云夷裔罪裔黜辱年旣湮男女常不履俗尙異縉紳鄉黨皆弗齒羞與締昏姻累世不與試難厠儒冠身麾之庠門外有司不見賓在昔阮學使甌東駐轍辰爰訪余氏族憫其久沈淪特與設學額章奏達楓宸遂令草笠輩獲與逢掖親自此聞詩禮文學遂彬彬因思普天下率土皆王臣納廟兼任黻通道及陌閭矧茲華夏處一視宜同仁泥塗經拂拭翹

然出風塵欣欣游化宇共樂登臺春

建陽小樂府

書燈田

美造士也

置田爲子孫膏火之費故建陽士人鮮貧

者

鄒志路

隣壁費鑿隨月升屋嗟嗟讀書夜無燭飢腸轉轂粥不
得畫嗟嗟讀書朝無粟何人創此書燈田膏腴割置東
西阡分收均收有遺則菑畚經訓多豐年明星在天燈
影爛滿城書聲起夜半

歲時補

迎梅送梅曲

吳振棫

四月麥黃五月梅黃新蠶入簇雨氣涼

俗有蠶黃梅之說逢壬

非遲逢丙非早有水飲牛莫懊惱

碎金集逢壬入梅神樞經逢丙入梅崔是

農家諺雨打梅頭無水飲牛

東畦樹麻西畦樹穀蓑衣箬帽堆滿屋

吳下田家志黃梅三時纔出門蓑衣箬帽必隨身

其來其來雨有足

朝聞濛濛暮聞淋浪冬青花開覆短牆

農家諺冬青花已開黃梅雨不

來

不愁綠繡簾衣長海東舶趁沸狂吹炎官將來雨官

避牛跡分開不同地今日何日吉日庚

俗云逢庚出梅

雷公打

鼓來送行小暑更祝雷收聲

諺云小暑一聲雷倒轉作黃梅打鼓送梅亦諺語

輿地補

舊邊詩九首

方還

鐵嶺迢迢接錦川關城三面繞烽烟春深秣馬蒲河北

秋老連營木葉前滄海舊聞通運舶金州誰解議屯田
諸軍自失橫江險白草黃沙暗朔天

遼東

北平雄鎮翼幽燕千里潮河朔漠連司馬高臺聞夜吹

盧龍古塞入秋煙開疆競說分三衛籌國何因棄外邊

歎息寧封南徙後遂令烽火達甘泉

薊州○初以大寧
為外邊永樂中寧

王丙徙而薊始重內
邊此失策之大者

萬全八驛接神京上谷千年漢將營地險旌旗藏殺氣

山盤鼓角壯軍聲邊歌竟日來紅石鐵騎中宵度赤城

誰識興甯殘廢後漠南無計援開平

宣府○棄大寧後
土木之變又棄興

和則開平
亦不能守

馬頭北去是雲中極目川原處處通繞鎮衛城分十五

沿邊都閫轄西東

明初設山西行都司管轄東西一十五衛

頽垣正接胡蘆

海名

月曠野長吹鷗鷺堡名風聞道頻年還調戍諸臣何策

建奇功

大同

三關平列勢逶迤日落連城鼓角多帳外深煙迷衆堡

營前孤月墜長河赤山寒谷驚烽燧青塚秋原入駱駝

誰使總戎移逸地偏頭空曠牧人過

山西○嘉靖中撫臣請移總兵于甯

武而偏頭一帶地皆空虛

榆林四望黃沙際千里連墩絕塞天夾道陳兵橫套口

長城環塹繞延川徙邊御史籌無缺

舊治綏德成化時都御史余子俊議

移鎮榆林內地遂安折色司農計苟全去治中改延慶等府本鎮之稅爲折色軍用始紂

此地從來多勇敢莫教枵腹事鳴弦榆林

鎮城西倚賀蘭開滿日沙飛簞策哀冰合黃河朝走馬

雲迷紅寺夜登臺膏腴昔日稱蕃庶蹂踐連年盡草萊

欲識金城舊方略濬渠卽是靖邊才甯夏○自築邊牆並窪溝渠修復秦

漢故跡爲全陝之利

秋入平原動鼓聲弓鳴風勁塞雲低漢家營壘沿山後

秦郡川原盡隴西徵調頻年憂戍士逃亡何計復烝黎

徘徊險阻誰爲守花馬池邊落日迷固原○八郡咽喉之地也虞詡守階

州招流亡開漕道羌人陷服卽其地也明代調臨鞏西鳳兵防守糧在本軍額內支給乖前人策矣

四月寺畢

卷一 輿地補

三

風急荒原落雁聲西河霜氣逼嚴城金笳幾處秋乘障
鐵馬連羣夜點兵充國留屯沙際沒嫖姚遺壘月中明
古來無限安邊策哈密徒勞苦戰爭

甘肅

善政補

粵西舊無育嬰堂創建告成有作 陳元龍

聖治重仁育保民如保赤矧茲眞赤子能不加愛惜粵
土多遺嬰戶口不增籍匪厥父母忍其故在貧瘠有力
能活之無乃長吏責七星巖之陽夷曠地多隙捐貲構
廣廈可貯兒數百保姆有衣糧醫藥有儲積襁褓紛縱
橫背負兼臂掖始或啼呱呱繼乃笑啞啞一堂皆陽春

生氣益牀席豫知廿年後繁庶倍往昔創舉不避勞垂
遠有成格作詩告來者無視爲陳迹

建甯創建育嬰堂紀事

唐孫華

好生由帝德濟物本吾儒念此孩提小須憑母氏劬緣
囊書未授葦篋死何辜貧室憎疣贅豪家卽掌珠豈緣
心獨忍直爲口難餬未得辭懷抱翻然擲道塗放麕慈
已斷舐犢愛全無司命何多事浮漚付一軀生來誰辨
姓父在早成孤宛轉憐垂絕辛酸聽泣呱吾宗仁者性
家乾九太
學首創 高義古人徒困橐先傾倒金錢共委輸招呼
來衆媼流落拾諸雛卜築辭湫隘枝撐立棟桴經營分

國朝詩鐸

卷一

善政補

三

虞餉屏擋及裙襦匍匐應知免軒渠喜更蘇禽知憐鰥
卵蟲解愛蒲盧煦嫗 皇仁播飛蠓 聖澤孚天胎懲
月令亭育補洪鑪盛事留堂構他年永勿渝

紀鄧嶰筠中丞善政

朱翔鳳

舉鄉賢 勵風紀也

鄉賢之舉風俗係門閭斯式社斯祭餘韻遷流欲委波
頽風推挽常循例公撫江淮閱幾秋關心舊德肆旁搜
桐城已推姚比部宿松更及朱編修文章道義俱無匹
俎豆千秋名稱實肅然當路樹風聲翕爾同時眇濫失
君不見婦人守節尋常多破格還旌朱義娥不獨幽光

賴闡顯要令風俗能漸摩

課書院 明實學也

皖江今會城論文立書院按月舉課程四方積賢彥中
丞政暇延諸生先使自好能懷刑獨標古均許識字還
明實學教通經已知文章日作江河下漸卽飢餓失安
雅誰作中流砥柱看自多拔幟登壇者烏庠士風民風
本相關士不空疏民不僇今刊戶誦家弦本早取浮華
次第刪

潁州婦 廣仁政也

潁州婦初適人入門見夫壻雄傑堪託身男兒空具好

身手日就閭閻聚羣醜一朝失墜禁網中荷戈驅向邊
城走當年法令定僉妻遠道數千行未稽良人縲紲吏
卒侮風沙摧折嬰孩號身本出深閨窺官顧名節遂多
自殘傷冀可明皎潔 國家立法懲儆凶人投裔凶
氣消原人中情異從坐陳法外意刪茲條不行亦如令
欲攜仍可聽既使保室家更教全性命君不見潁州婦
女免匪辜公爲 朝廷布仁政舊例潁州府屬兇徒結夥三人以上執持兇器傷人者不分首從發極邊煙瘴充軍僉妻發配公奏言該府屬民俗強悍非此不足示懲定例之後節次加嚴何必以僉妻發配例內似無深意此等婦女本係無罪之人一經隨夫僉發如長途摧挫難堪兵役玷汚可慮或本犯病故則異鄉發婦飄泊無依或本婦身亡則失恃孤嬰死生奚保况潁屬婦女頗顧名節一聞夫男犯

罪自知例應僉配或傷殘以求免或自盡以全身在本
犯肆爲兇暴法網固所難寬而本婦無故牽連苦衷亦
所宜恤云云嗣奉
旨刪去此條

江之水 請蠲逋糧也

江之水溢涸無常期有時水平得土見人力墾爲一歲
蓄江泉閒地無垠塲幾年偷種勤收穫畝澮溝渠漸接
連官司尺寸皆量度從此官糧不可逋鞭扑還徵累歲
租誰知水長田俱沒到官那復完肌膚不獨民無膚亦
知官有責坐虛十萬糧牧令都無策公爲藩伯莅荆楚
有爲窮黎陳疾苦一時蠲免下 明詔隸不叫呼人自
愈吁嗟小民思易遷貪目前利忘後艱每祝江湖日夜

退還望江水淤成田莫望淤成田卽今上官有幾知痛

瘠湖北於嘉慶年間查出民間私墾地畝丈量墾科且追繳從前花息幾四十萬而升科之地未久有沒於水者雖隨時題豁而花息之追如故道光元年尙有應追銀十餘萬兩追呼鞭扑民不堪命公權藩篆力陳其害陳望坡尙書詳請

奏豁得

旨允行

國朝詩鐸卷一終

輿地又補

出嘉峪關

錄三首

林則徐

嚴關百尺界天西，萬里征人駐馬蹄。
飛閣遙連秦樹直，繚垣斜壓隴雲低。
天山巉削摩肩立，瀚海蒼茫入望迷。
誰道殺函千古險，回看祇見一丸泥。

敦煌舊塞委荒煙，今日陽關古酒泉。

古玉門關在今敦煌

不比鴻

溝分漢地全收雁，磧入

堯天威宣貳負陳，戶後疆拓

匈奴斷臂前，西域若非

神武定何時，此地罷防邊。

又按文忠公奉使回疆議墾田事督墾萬畝納糧充餉抵免部撥新疆經費有但期繡隴成千頃敢憚鋒

車歷八城之句

臺灣近詠

射鴈樓詩話
采十首之三

藍鼎元

臺俗敝豪奢亂後風猶昨宴會中人產衣裘貴戚愕農
惰士弗勤逐末趨驕惡鬻陵多健訟空際見樓閣無賤
復無貴相將事博博所當禁制嚴威信同絳鄂爲火莫
爲水救時之良藥

臺地一年耕可餘七年食今歲大有秋倉儲補云急穀
貴慮民饑穀賤農亦惻厲禁久不弛乃利於奸墨徒有
遏糴名其實竟何益

諸羅千里縣內地一省同萬山倚天險諸港大海通廣
野渾無際民番合喁喁上呼下卽應往返彌月終不爲

分縣理其患將無窮南劃虎尾溪北距大雞籠設令居
半線更添遊守戎健卒足一千分汛扼要衝臺北不空
虛全郡勢自雄

仙霞關

陳壽祺

萬馬奔雲截翠屏東南一柱此亭亭十洲地入無邊碧
百粵天低未了青絕磴捫梯爭鸛鵲虛崖裂磳走風霆
淮南抗疏千年後信有王公設險靈

越王臺上海雲馳曾憶將軍下瀨師空詫九龍擎寶帳
頓看萬騎拜珠旗一門箭箬通天迴半壁山河落日遲

回首高峰橫槩地猶疑深翠宿熊羆

李文襄扼耿逆處
康良親王大兵至

國朝詩鐸

卷一

輿地文補

聖

賊將獻關
降遂平之

上方鐘磬入雲迢積翠中天鎖寂寥蘭橈宮壇羣帝近
桂旗風雨百靈朝融城白雪迷春戍傍广音掩高屋之形紅泉
飲暮樵獨倚藤蘿乘縹緲寒花酌酒亂山椒

城上雲隨石扇開黃蒿猶冒女牆隈三更鼓角催星落
萬谷笙鐘挾雨來楓嶺北行邊地斷漁梁南去惡灘迴
一夫荷戟尋常事莫遣啼猿日夜哀

前題

黃紹芳

竹光團綠雲日色冷孤嶂山落百蠻中路出青天上關
門迴孤峰飛鳥未敢傍一綫走中原石角皆北向閭藩

昔芽蘖豕突逞狂妄堂堂李文襄提兵扼其吭賊騎阻
長驅當關氣特壯旌旗太末城俯視爲神王半壁東南
天一洗黃茅瘴清晏三百年雞犬保無恙時有采樵人
落日聞歸唱

政術補

讀王子壽論史詩廣其意

錄五首

朱琦

黜陟以三載令簡吏無瀆國之二柄賞與罰先其大者
而已足秦人好量書日夜不得息隋文勞吏案猜忌多
苛刻君不任相親其細相不求賢鰥厥職荀卿亦有言
主好要百事詳主好詳百事荒犖犖萬世挈政綱親賢

遠佞邦必昌

取人必以言高宗恭默尊如天取人不以言唐虞考詢
胡爲然能行爲上言爲次眞知其人不得試晉夫喋喋
釋之諫忠規諤諤著廟廊豈無椎樸不出口亦有便佞
舌如簧兼聽則明偏聽闇藥言諤言宜審詳尙書道要
守一語有順汝心有逆汝慎戒面諛君記取

女無美與惡入室先見妬士無愚與智入朝寵爭固儉
人辱高位豺狼方當路捄亂旣無術萬事委厄數簿書
徒疲勞誤人邦國坐自誤惠卿巧令公喜主簿黠令公
怒用之則虎不用則鼠信哉小人易進而難去

漢高落落英雄姿當機立斷不復疑爵不阿近罰不私
此意昭烈深知之賢臣小人兩言耳太息究論無厭時
天下豈可謂無人惟賢知賢獲其真鄭有子皮齊鮑叔
進賢者賞蔽賢戮天下安危各有注將相和調士豫附
願書此語如陸賈猶勝叔孫徇時務

海內汲汲苦兵食漏卮不塞終無益糧莠不亟去嘉禾
不得殖盜賊不盡翦繇役無日息緡錢下策出宏羊變
法之始猶端詳朝布一令夕又改雖有上策無由臧吏
道太雜礙官方條例滋多飽胥囊本計終當返耕桑積
弱何以變富強